



KENYATAAN/SIARAN AKHBAR

Perbadanan Putrajaya (PPj) ingin merujuk kepada artikel berjudul 'Ada Tangga, Guna Cerun' yang disiarkan melalui segmen Sentral, Berita Harian pada 14 April 2010.

Dimaklumkan bahawa laluan yang disangkakan tangga itu sebenarnya bukanlah tangga untuk kegunaan awam. Ia merupakan inisiatif pemaju sendiri yang membina laluan tersebut untuk memudahkan kerja-kerja pemeriksaan dan penyelenggaraan sistem perparitan yang terdapat di situ. Jika diperhatikan gambar-gambar yang disertakan, ia jelas menunjukkan laluan tersebut bukan untuk kegunaan awam kerana di bahagian atas cerun terdapat 'guardrail' manakala tangganya juga tidak mempunyai mutu 'finishing' yang sesuai untuk kegunaan awam. Pihak pemaju juga telah menutup kedua-dua hujung tangga tersebut untuk menghindar orang awam dari menggunakannya.

Sehubungan itu, PPj akan berbincang dengan Bahagian Pengurusan Harta, JPM (BPH) dan Persatuan Penduduk berhubung keperluan laluan tersebut. Sekiranya didapati sesuai, PPj akan menyediakan rekabentuk dan membina laluan yang selamat bagi kemudahan pelajar-pelajar sekolah yang berkenaan.

Sekian dimaklumkan, terima kasih.

(ZAHARAH SALAMAT)
Timbalan Pengarah Kanan Perhubungan Awam
b.p. Presiden Perbadanan Putrajaya

Tarikh: 15 April 2010

Disediakan oleh Bahagian Perhubungan Awam untuk PERBADANAN PUTRAJAYA
Tel: 03-8887 7033 Faks: 03-8887 5013

Akhbar : Berita Harian
Segmen : Sentral
M/s : 1
Tarikh : 14 April 2010

Ada tangga, guna cerun

Oleh Azrina Ahsan
dan Siti Aishah Sukaimi
@news@berita.com.my

Laluan ditutup menyebabkan pelajar kena daki bukit licin

PUTRAJAYA: Sebilangan murid Sekolah Kebangsaan Putrajaya Presint 9 (2) di sini terpaksa mendaki dan menuruni cerun ketika pergi dan balik sekolah selepas laluan bertangga yang menghubungkan kawasan apartmen mereka, ditutup.

Keadaan cerun yang curam dan licin terutama selepas hujan memang membahayakan tetapi kerana ia adalah laluan terdekat untuk pulang ke rumah dan menjadi pilihan sebilangan besar murid sekolah berkenaan.

Ketika ditemui, beberapa murid berkata, mereka terpaksa menempuh cerun berkenaan untuk pulang dan pergi ke sekolah dengan menggalas beg dan buku.

Mereka mendakwa sudah biasa menggunakan laluan itu sejak awal tahun lalu kerana laluan alternatif yang disediakan agak jauh iaitu kira-kira satu kilometer dari pintu utama sekolah untuk ke rumah mereka di apartmen itu, berbanding laluan bertangga itu hanya 300 meter.

Muhammad Bokhairi Kamaruddin, 11, berkata setiap hari dia terpaksa melalui cerun bukit itu untuk pergi dan pulang dari sekolah kerana laluan bertangga yang disediakan di situ tidak pernah dibuka sejak ia siap dibina.

"Sudah lebih setahun saya dan adik menggunakan laluan cerun bukit ini untuk pergi dan pulang dari sekolah kerana ini saja laluan paling dekat ke rumah.

"Ia memang menyusahkan lebih lagi apabila kami perlu membawa banyak buku ke sekolah pada hari tertentu dan pada masa sama terpaksa menggunakan laluan cerun bukit ini," katanya.

Malah, Muhammad Bokhairi berkata, beliau pernah terjatuh ketika melalui cerun bukit itu ketika pulang dari sekolah.

Perkara sama turut diluahkan Muhammad Amirullah Kamaruddin, 8, kerana baginya laluan itu adalah kemudahan untuk murid ke kuarters kerajaan berhampiran.

"Saya minta supaya laluan bertangga ini dibuka untuk memudahkan kami ke sekolah," katanya.

Sementara itu, Nurabilah Iham, 12, berkata beliau pernah melihat seorang murid terjatuh hingga terkoyak seluar di bahagian lututnya ketika mendaki cerun itu.

"Keadaan itu berlaku selepas hujan dan ketika itu laluan sangat licin serta berbahaya kepada pengguna untuk menggunakannya.

"Saya sendiri pernah terjatuh ketika melalui laluan ini tetapi disebabkan laluan ini paling cepat untuk ke sekolah, saya terpaksa menggunakannya kerana ibu bapa tidak berkesempatan untuk menghantar pergi dan balik setiap hari," katanya.

Tinjauan *Sentral* mendapati laluan bertangga dari kuarters kerajaan cuma bersebelahan dengan Sekolah Menengah Kebangsaan Putrajaya Presint 9 (2).



PELAJAR terpaksa mendaki cerun berbahaya untuk ulang alik ke sekolah berikutan laluan bertangga yang dibina dikunci.